

福建通志

館玖拾柒册
共壹百册

福建列女傳卷五下

節烈十一 莆田

陸柔歐陽夢桂妾海鹽人隨母流落至閩桂納之桂嘗上書論捍禦元兵機宜德祐初元兵入臨安桂在太學元脅受以官桂鬱鬱有南歸意爲仇人所發下獄赦出卽死氏母數譴氏他適不從已而母陰以氏許虜酋張姓者氏曰我主死於虜我肯屈事虜哉逼之遂自經

李氏陳元伯妻夫溺死氏尋其屍不得自投於水

高氏薛元第妻嫁未數月夫卒於粵氏聞訃日夜號慟喪畢氏亦哀毀死方氏薛瓊妻夫卒日夜仰天大哭數月遂自經死

張氏崔世德妻歸三年夫亡自經

章氏方大道妻家遭疫死已半大道又歿撫棺大慟數月自經死

以上宋

陳氏崔儀妻家貧勤女紅佐孝養儀登宏治進士以病請假歸未幾卒氏視殮畢卽入房自縊殉

黃氏詹秉直妻嘉靖間廣賊猝至與姑同被執賊索姑金帛筆撻慘酷氏號呼願代賊殺姑氏厲聲哭罵奪其刃自殺

陳氏王原德妻寡居王莊廣賊盡得王莊諸婦女惟氏抗死房闌中

張氏王大勳妻夫亡自吃糠覈以米啗姑遺腹生男撫教之倭賊旣入城與婦朱氏扃門燔死

陳氏朱雲衢妻夫歿內外家欲奪其志氏自縊

陳氏朱朝勳妻夫病刲股籲天請代及卒視殮畢自縊

翁氏高翰妻賊入城氏抱姑哭賊殺姑又殺其幼子脅以刃曰不從砍矣氏罵曰姑死子死吾獨生乎伏姑屍大哭遂遇害

柯氏林觀頤妻倭圍城氏語妯娌曰城陷死矣賊至被執至顧家池亭賊稍侵之遂赴水死

陳氏林觀文妻倭陷城被執不屈賊生得而投之水中

王氏林文鉞妻黃氏鄭氏文鉞孫婦王早寡撫孤有孫矣城陷遇賊賊欲

刃之孫廷準曰祖母守節願殺吾賊殺準王得釋準妻黃氏縋城遁入山
聞夫被殺不食死準弟廷漑以護幼弟出城爲賊所殺未娶婦鄭氏適被
繫亦自投白馬潭中

鄭氏林承芳妻遇賊憤罵賊怒割其左耳罵益厲賊復割其右耳又罵賊
大怒割其鼻逐之時夫死室燬乃歸父母家與弟拾野菜取松毛自給以
終

劉氏林須恭妻姿貌殊麗賊強欲侵之氏抗拒刃其腹同俘者見其屍仆
地猶手執襖襠賊感動爲具棺殮須恭是日亦被害於他所

方氏陳在良妻倭陷城與姑及夫出避賊賊擁至俱相失賊逼之罵賊投
河死

邱氏陳準妻年方艾流賊入其家時氏在樓二賊捉之遂投樓下死葬於
舅姑墓側夜時有火光後占墳有水啓別竈皆水滿獨氏竈有團火出穴
人謂正氣所感也

黃氏陳復拱妻遇賊垢面冀免賊逼之梳洗氏哭罵奮前奪刀賊大怒曳之出氏且指且罵賊刀劈之五指俱落仍刺殺之同俘者覆青袍積薪焚其屍

鄭氏陳七妻幼議婚於七七弗類七祖希珍請退婚絕粒誓死及于歸事希珍孝謹七果有稔惡氏以扇掩面自經死

游氏周大佐妻倭陷城被執賊責贖金露刃臨之氏無懼色值他賊過欲以金代贖氏罵益甚遇害

陳氏鄭任妻倭入城卽投井以救免同夫被執八營旣而夫釋氏獨留遂罵賊死歸殯之面色如生

鄒氏鄭肇妻倭賊陷城肇被執舅引姑及氏匿鄰舍天明賊獲之逼使前氏奮曰死卽死耳不可前也賊怒刀刺洞胷血被地猶屹然坐姑驚號賊砍姑頰氏益憤罵激烈賊遂刺其喉以死

蕭氏鄭若濟妻倭至江口若濟遇害時蕭入城聞訃卽投橋下死

陳氏鄭東野妻賊入城卽投井家人救出之同夫被執罵賊死

蕭氏鄭日新妾與婢同爲賊執曰吾必死之卽以所生子付嫡既至賊營逼之不從佯欲殺之卽引頸受刃如是者三婢勸之曰何自苦乃爾怒罵愈厲賊殺之

陳氏李塗妻塗嬰疾氏事之惟謹奉姑甚孝倭執而逼之罵賊赴水死

林氏雍士憲妻倭至姑卧病氏不忍去賊將殺姑氏請代賊見氏色而悅之免其姑縛氏去至渠河紿曰不須縛願自行賊信而解之投河死

黃氏阮有道妻居海上聞倭警携二子附舟避之賊追至赴水死有道從弟適克妻陳氏遇賊上亦赴水死

林氏蕭奇烈妻林氏蕭奇照妻同孀其節倭至城二婦相語曰吾二人嫠居十年義不可辱當求所以生二孤耳奇照妻縋兒城外投城下從之奇烈妻則毀面易丐者服從城門出奇照妻足傷尋卒奇烈妻被傷仆地力護其兒居月餘亦卒

唐氏蘇繼茂妻倭圍城急指後庭井謂賊獲曰城陷此吾死所矣倭入城盡室逃竄氏投井死

劉氏黃斌卿妾微時夜夢黃龍入室翌日斌禡禡至氏矢志從之既而斌遠遊家益困家人妲氏嫁氏顧斌前妻二女曰汝二人自爲計遂投水歿二女亦投水死斌後富貴自銘其墓

陳氏黃河妻河陷賊營賊質以索鏹氏徧貸宗人無所得乃自入賊圍請代告賊曰必放夫出鏹乃可得逾旬河不至賊以爲紿已引出割其乳立斃

陳氏黃士寵妻士寵蕩子也氏俯拾仰取生有男女而士寵歿舅欲嫁之涕泣跪庭自明志義無何男女皆夭志節益堅寇且至城中屢驚語人曰吾聞死而無辱則魂魄不媿意被擄赴水死

朱氏張氏黃采妾賊入城朱自經死張與采被執賊屢犯不從執采焚之張自投烈火死

翁氏黃懋志繼妻莊重美姿賊見而悅之氏給以更衣入室自經

高氏黃約妻城陷抗賊死節

陳氏吳應桓妻寇獲之大號曰一死便休豈從汝耶仆地不起賊遂以刀刃之

鄭氏吳緒妻夫亡勸節城陷死於賊

莫氏吳鴻猷妻夫歿氏慮姑老過慟私持草薦夜卧夫柩下晨夕上奠取夫書藉置於前一日回外家別父母歸整衣以管鑰付姑閉門自經

張氏宋茂瀄妻賊逼之具脂粉使自飾氏號罵盡碎其具賊欲刃受以頸乃禁之密室氏潛自牖出抱乳兒下井死

何氏郭景順妻遇賊勒之不從欲兵之曰可殺不可辱賊五舟聯爲一舟縛氏出刃摩其頸以示同俘諸婦時冬衣絮領厚氏自扣衣領伸頸受刃嫚罵祈死賊怒殺之投屍海中

黃氏李啓謨妻氏方盛年賊至乃匿其男雞栖中覆以麥草與二女俱投

水死

陳氏廬土行妻夫死視殮畢自經以救免遂絕粒十餘日嘔血數升而逝
王文奎女江口前王村人方笄被擄給賊曰渴甚欲汲江水飲之乃約帛
束衣沈於江順流下海數日矣屍忽乘潮而返肌不露而色如生

林氏魏雲章妻夫病刲股愈之越九年疾復作不起氏哭奠畢自經

王氏張廷光妻廷光隨父卒於官邸久之父亦卒姑吳氏私與季子謀嫁
之氏不從自經死

張氏唐端位妻夫死母令改適不從母以疾召歸潛許鄭姓者氏聞自經
而死

鄭氏邱伯載妻無子舅早世與姑曾氏相依家貧紡績茹素二十年營葬
舅與夫畢即減食哀慟死

余氏樂溫妻溫商溺河死訃聞氏索屍哀痛沿河徬徨月餘不得遂自經
溝頭地嫗賊入莆田將殺一男子嫗抱持云夫也賊奪而殺之嫗撫屍裏

血哭移時亦遇害

北門嫗賊殺其姑抱哭同死

後村婦人容色甚盛不受賊汙曰請受刃賊戀之置諸房乃自垢其面請死甚切賊不聽復以火毀面皮賊舍之

陳氏許有容未婚妻未行夫亡以烈殉

鄭氏吳世勳未婚妻既許字氏兄恥吳貧挾勢悔婚而納富家聘氏縊素臨之曰吾有死而已碎其聘登樓不食死

翁氏朱紀未婚妻紀亡女欲往弔奉姑父母不可遂不食越月父爲卜婚自經死

鄭氏林

一作陳

嘉猷未婚妻未成禮夫卒憂憤絕食竟自經

康氏林九錫未婚妻父與林瑛善以許其子九錫已行繫臂禮及貴抵家聞瑛繼妻不恤前人子遂潛取宗人女并載宦游意欲爲女代也女知之卽不食私語泣宗人女曰吾誓必死宗人女亦歔歔泣下比至驛舍病轉

元史及文傳
劇父母聞之垂淚不能語遂絕越二日宗人女亦暴卒其夕林瑛髣髴見
二女來拜謁心驚訝之後果聞其事

何氏卓爾植未婚妻夫死力請奔喪謁舅姑撫屍大哭是夜解襟帶自經
顏色如生

陳若瑛舒郎未婚妻義門人舒歿不食死臨終留詩云有女名若瑛義門
陳氏子女紅中饋餘頗亦嫻書史十九聘舒郎雙璧燦盈貯百年偕老期
竟爲天所阻妾心雖未明妾心良已許豈無展轉匹志奪妾所恥各旣爲
君婦能不爲君死我生尙氣節賦終毛髮豎

王氏陳商未婚妻福清人商死奔門守節倭變與舅姑竄梧嵩山被獲給
賊釋舅姑及夫之二幼姪相從至涵江賊營卽以所藏利刃刎喉死賊知
其爲烈女也以錦衣衣其屍相率羅拜昇置江邊爲潮沒去又放同日所
擄者以上明

戴氏蔡貞啓妻貞啓自浙扶父櫬歸尋卒氏無子越數日沐浴素服訣族

戚閉戶自經

許氏翁帝城妻孝事舅姑夫早歲登科體素弱病篤氏籲天請代夫歿納髮柩中不食十餘日卒

陳氏翁某妻歸三日夫卒毀幾絕殮後營葬畢自投縊死

林氏黃子萬妻夫歿終養舅姑服闋於夫忌日自縊死

蔡氏黃彥彬妻彥彬犯癩年餘臭穢達戶外氏盥拭無厭倦及卒遂自縊死

陳氏黃士斐妻氏歸涵江外家值海寇登岸被執不辱斷五指臂傷數刃遂遇害

林氏黃士洙妻夫歿生子昺甫晬守節撫孤未幾昺卒氏絕粒十餘日死

王氏黃維中妻夫歿忍饑守節爲夫立繼畢卽盡節殉

陳氏黃華崗妻能詩夫業版築性卞急稍不如意輒呵責之毫無愠色夫死念舅姑年老曲意侍奉及歿喪畢自縊卒

陳氏黃君朝妻歸三年夫歿於浙罄篋挈骸歸姑旋歿復經紀其喪絕粒旬餘自縊死

林氏陳某妻被強暴洪姓戲逼不從仰藥死

程氏陳鉉美妻幼事寡母以孝稱長適陳事姑如母未舉子爲夫置妾生子壻撫如已子順治閒海寇亂夫被俘氏泣語家人曰與其貪生以受辱毋寧就死以解禍遂投繯死賊驚歎釋其夫歸

林氏陳開妻事舅姑孝順治閒海寇亂被執不屈乘閒投崖死

李氏陳士欽妻夫病刲股焚臂祝天請代不效遂絕粒九日弗死吞金又弗死卒投繯逝

姚氏陳季寅妻寡數歲遺孤殤氏痛夫及子遂自經

林氏陳肇修妻夫卒奉舅至終喪畢從容縊死

徐氏陳八士妻時海寇猖獗八士同氏携兒女入山避難至東山男婦衝突失夫所在氏哭謂女引治曰賊且至遭掠我分必死解衣帶自經引治

亦縊

林氏陳敏妻家貧如洗夫充海壇卒歿於海氏紡績事姑終喪亦投海死
徐氏陳天祐妻夫歿遺腹二孤家貧事姑甚孝或以窮勸改適氏辭姑絕
粒七日自經

葉氏陳敬厚妻夫歿臺灣無子紡績養舅舅歿託所親收夫屍骸歸葬訖
遂吞金死

鄭氏楊展驥妻順治戊子寇變氏携幼子扶姑爲賊所掠恐傷其姑强行
數步抱女偕沒於水

陳氏吳公拔妻早寡順治間海寇至姑被擒氏挺身救姑得脫寇執氏逼
之不從引頸受刃而死

高氏吳洪妻病篤焚腕以禱於天後及歿剪髮納夫柩中自經死
林氏吳吉妻夫卒絕粒不食登堂拜舅姑及族戚吞金死

喻氏吳煥叟妻夫歿氏青年守志養老姑及歿痛哭斷餐月餘死

黃氏吳廷揚妻婚二載夫亡立嗣終喪母逼再醮氏吞金死

陳氏吳志用妻夫亡守節撫孤世璉成立未幾歿氏與媳同時投繯死

林氏張衷燦妻順治丁酉海寇掠婦女氏罵賊不辱被殺長子垣奔救亦

墜坑折足死

鄒氏張誨妻夫死號哭欲絕未幾葬夫畢投水死

張氏余偉妻順治丁酉爲海寇所掠不從被創赴井死姑吳氏與一女繼之

林氏王廣質

一作盾

妻順治庚子海寇登岸掠婦女氏罵賊不屈遇害

鄭氏方塘妻康熙甲寅寇亂山民避寨自守塘病卒賊攻寨愈急氏恐其辱自經而死

鄭氏方璧仲妻遭變被虜不屈自縊

王氏朱大雲妻值避海寇難甫出門一寇突至欲辱之投水死

林氏江中信妻夫歿於海氏喪服畢赴海死

鄭氏林宜伯妻夫亡哭盡哀葬姑畢與族戚訣自經死

周雲香林興妻王氏婢也姑病刲股夫病亦然未幾姑與夫俱歿拜辭主母自縊死

張氏林翼生妻翼生病劇自度不起謂氏曰汝年少無子能久留乎氏嚙一指爲信誓俱死夫卒氏吞金亡

顧氏林振光妻夫死矢志不改父母憐其少命刺紅繡遣氏嫂微示之意氏遂置鞋流淚絕粒十四日卒

鄭氏林振先妻早寡避賊松嶺下遇賊欲汙之罵不絕口賊怒肢解之唐氏林祐妻夫歿爲立嗣營葬畢拜謝翁姑吞金盡節

黃氏林鑑妻夫歿哭盡哀喪盡禮立嗣承祧將卒哭沐浴更衣閉門自經張氏林一作鄭應金妻姑病氏刲股和粥愈之夫又疾篤氏叩天願以身代

潛赴水死越日夫果愈

陳氏林光黎妾嫡程氏生男焯甫八歲程與夫相繼殞氏念主柩未葬貌

孤弱小矢志守節家貧紡績資焯膏火讀書爲夫營葬及焯入泮氏從容
殉節

鄭氏林清若妻夫歿服闋遂殉節以死

黃氏林朝對妻夫歿勤女紅孝養舅姑二十一載舅姑旣逝立嗣畢捐軀
殉節

俞氏林樹雅妻歸四載樹雅買殯臺灣氏聞訃慟絕忍死含哀立夫姪藩
爲後卽投繯死

鄭氏林嘉楠妾博羣書知大體能背誦函史全帙嘉楠臥病令其授兒孫
句讀經義篝燈督課不啻嚴師夫歿氏卽欲自裁爲家人救免哀慟成疾
絕粒伏牀子作桂刲股和糜以進氏曰從爾父於地下吾之幸也兒當顯
揚爲孝母毀傷體膚不服藥卒

李氏林協生妻夫卒無嗣氏飲泣三年力營窀穸吞金死

吳氏林潛光妻夫入泮旋亡氏爲立嗣奉養舅姑期年絕粒死